

Masalah di Cameron Highlands malukan saya — Adnan

UM 1 1 FEB 2003

KUANTAN 10 Feb. — Menteri Besar Pahang, Datuk Seri Adnan Yaakob berkata, masalah yang timbul di Cameron Highlands adalah sesuatu yang memalukan beliau kerana isu berkenaan menjadi buah mulut masyarakat.

Kata Adnan, beliau terpaksa menebalkan muka bagi menghadapi isu itu apatah lagi ia turut mendapat perhatian Perdana Menteri, Datuk Seri Dr. Mahathir Mohamad.

“Saya berasa sangat malu dan terpaksa menebalkan muka bagi menghadapi isu ini,” katanya kepada pemberita selepas mempengerusikan mesyuarat Jawatankuasa Perancang Negeri di sini hari ini.

Baru-baru ini, Perdana Menteri melahirkan kesedihannya terhadap pembangunan keterlaluan di Cameron Highlands yang terbukti tidak mempedulikan soal kepentingan alam sekitar.

“Kita sedih bagaimana Cameron Highlands sudah diratakan sehingga tidak nampak lagi kawasan berbukit, sebaliknya ia menjadi seperti tanah pamah yang diratakan dan saya percaya iklimnya juga akan berubah,” katanya.

Sehubungan itu, Perdana Menteri menegaskan, hanya hukuman penjara sahaja dapat memastikan ‘pemaju yang tamak’ tidak melaksanakan pembangunan di kawasan tanah tinggi dan bukit-bukau secara sewenang-wenangnya.

Sebelum ini, akhbar melaporkan sekumpulan syarikat menggunakan peralatan berat untuk meratakan satu kawasan yang dahulunya merupakan sebahagian daripada ladang teh Blue Valley di Cameron Highlands.

Perintah

Mereka terus berbuat demikian meskipun Majlis Daerah Cameron Highlands (MDCH) mengeluarkan dua perintah menghalang kerja itu manakala Jabatan Tanah dan Galian Negeri telah membuat laporan polis.

Adnan menjelaskan, kerajaan negeri memandang serius isu berkenaan dan oleh itu, arahan memberhentikan kerja-kerja pembangunan Cameron Highlands buat sementara waktu dikeluarkan.

Tambah beliau, hanya kerja-kerja menggali dan mengorek saliran dibenar-

kan bagi mengelakkan mendapan dan pengaliran tanah ke sungai berlaku.

Adnan turut menegur sikap pemaju yang tidak mengambil berat soal alam sekitar dan berharap pemaju-pemaju terbabit mengambil iktibar daripada isu tersebut.

Beliau berkata, dalam menghadapi isu berkenaan, kerajaan negeri akan mengambil kira ulasan dan pandangan badan-badan bukan kerajaan (NGO), orang perseorangan dan laporan media.

“Kerajaan amat sensitif terhadap semua ulasan yang dikeluarkan melalui media dan juga NGO.

“Kita memberi perhatian sepenuhnya khususnya laporan yang membabitkan ulasan NGO dan media kerana kerajaan negeri tidak mahu timbul salah faham orang ramai mengenai isu Cameron Highlands,” katanya.

Menurut Adnan, pihaknya akan menyediakan butir-butir lengkap mengenai Cameron Highlands dan akan menyerahkannya kepada NGO dan pihak media massa selepas Hari Raya Aidiladha.